

**Z A K O N**  
**O RASELJENIM LICIMA I POVRATNICIMA U FEDERACIJI BOSNE I HERCEGOVINE I**  
**IZBJEGLICAMA IZ BOSNE I HERCEGOVINE**  
**(Službene novine FBiH, br. 15/05 od 16. marta 2005.god.)**

**I OSNOVNE ODREDBE**

**Član 1.**

Ovim zakonom uređuju se: osnovna prava i obaveze raseljenih lica i povratnika, sticanje i prestanak statusa, njihov povratak u prebivalište iz kojih su raseljeni (u daljem tekstu: prebivalište), način vođenja evidencija o tim licima, osiguravanje sredstava za povratak i ostvarenje drugih prava, kao i druga pitanja u vezi sa pravima i obavezama ovih lica na teritoriji Federacije Bosne i Hercegovine (u daljem tekstu: Federacija).

**Član 2.**

Pitanja u vezi s raseljenim licima, povratnicima u Federaciji i izbjeglicama iz Bosne i Hercegovine uređuju se u skladu sa Zakonom o izbjeglicama iz Bosne i Hercegovine i raseljenim osobama u Bosni i Hercegovini («Službeni glasnik BiH», br. 23/99, 21/03 i 33/03), ovim zakonom i propisima kantona.

**Član 3.**

Nadležni organi Federacije, kantona i općina obavezni su da, u skladu sa Ustavom Federacije Bosne i Hercegovine, ustavom kantona, ovim zakonom, drugim propisima i dokumentima, podstiču povratak i stvaraju političke, ekonomske i društvene uvjete koji doprinose dobrovoljnom, sigurnom i održivom povratku raseljenih lica Bosne i Hercegovine i izbjeglica iz Bosne i Hercegovine.

**II PRIZNAVANJE I PRESTANAK STATUSA RASELJENOG LICA I POVRATNIKA U FEDERACIJI BOSNE I HERCEGOVINE**

**Član 4.**

Raseljeno lice, u smislu ovog Zakona, jeste državljanin Bosne i Hercegovine koji je nakon 30. aprila 1991. godine raseljen na teritoriji Federacije usljed sukoba, progona, iz opravdanog straha od progona ili povreda ljudskih prava na teritoriji Bosne i Hercegovine, a ne postoje uvjeti za siguran i dostojanstven povratak u svoje prebivalište, niti se dobrovoljno odlučilo na izbor novog mjesta življenja.

**Član 5.**

Povratnik je izbjeglica iz Bosne i Hercegovine ili raseljeno lice koja je nadležnom organu izrazilo volju za povratak u ranije prebivalište i koja je u procesu tog povratka, kao i izbjeglica iz Bosne i Hercegovine i raseljeno lice koje se vratila u svoje ranije prebivalište.

Povratnici to prestaju biti istekom roka od šest mjeseci, računajući od dana kada su se ponovo nastanili u svoje ranije prebivalište-adresa prebivališta.

Povratnikom, u smislu ovog Zakona, ne smatra se lice koje se nastanilo u drugo mjesto prebivališta unutar Bosne i Hercegovine.

**Član 6.**

Izbjeglica iz Bosne i Hercegovine, u smislu ovog zakona, jeste državljanin Bosne i Hercegovine koji se nalazi izvan Bosne i Hercegovine, a koji je zbog sukoba proganan sa svog prebivališta ili je napustio svoje prebivalište u Bosni i Hercegovini i izbjegao u inozemstvo nakon 30. aprila 1991. godine bojeći se opravdano da će biti proganjen zbog svoje rase, vjere, nacionalnosti, pripadnosti nekoj socijalnoj grupi ili svojih političkih mišljenja i koji nije u mogućnosti da se sigurno i dostojanstveno vrati na svoje ranije prebivalište, niti je dobrovoljno odlučio da se trajno nastani izvan Bosne i Hercegovine.

Status raseljenog lica priznaje se izbjeglici iz Bosne i Hercegovine koja se vratila u Bosnu i Hercegovinu i koja nije u mogućnosti da se sigurno i dostojanstveno vrati u svoje ranije prebivalište niti je odlučila da se trajno nastani na drugom mjestu u Bosni i Hercegovini.

### **Član 7.**

O priznavanju i prestanku statusa raseljenog lica, u smislu ovog Zakona, kao i priznavanju njegovih prava i obaveza, odlučuje nadležni organ uprave kantona određen kantonalnim propisom.

Protiv rješenja iz stava 1. ovog člana može se izjaviti žalba Federalnom ministarstvu raseljenih lica i izbjeglica (u daljnjem tekstu: Federalno ministarstvo) u roku od 15 dana od dana prijema rješenja.

Protiv rješenja iz stava 2. ovog člana, može se pokrenuti upravni spor.

O pravima i obavezama raseljenog lica i povratnika, koje su određene propisom kantona, odlučuje nadležan organ određen propisom kantona.

### **Član 8.**

Status raseljenog lica priznaje se od dana kada je raseljeno lice ili povratnik podnio zahtjev za priznavanje tog statusa.

Licu kojem je priznat status raseljenog lica izdaje se legitimacija raseljenog lica.

Na lični zahtjev povratnika nadležna služba izdaje uvjerenje o statusu povratnika.

Propis o obrascu legitimacije iz stava 2. ovog člana donosi Federalni ministar nadležan za poslove raseljenih lica i izbjeglica (u daljem tekstu: ministar).

### **Član 9.**

Status raseljenog lica neće se priznati licu koje je pravomoćnom odlukom osuđeno za krivično djelo protiv čovječnosti i međunarodnog prava od Međunarodnog krivičnog tribunala za bivšu Jugoslaviju ili Suda Bosne i Hercegovine, a takvom licu status raseljenog lica ponovo će biti priznat nakon cjelokupnog izdržavanja kazne.

### **Član 10.**

Status raseljenog lica prestaje:

1. dobrovoljnim povratkom na ranije prebivalište;
2. odbijanjem povratka u ranije prebivalište iako je dobrovoljni povratak u ranije mjesto prebivališta moguć, siguran i dostojanstven i kada ne postoje uvjerljivi razlozi koji proizilaze iz ranijeg proganjanja ili uvjerljivi humanitarni razlozi;
3. kada se raseljeno lice dobrovoljno odlučilo stalno nastaniti u drugom mjestu na teritoriji Federacije;
4. kada je raseljeno lice dobrovoljno raspolagalo svojom prijeratnom imovinom u ranijem mjestu prebivališta (prodaja, zamjena, izdavanje pod zakup);
5. kada raseljeno lice raspolaže svojom imovinom u mjestu boravišta (kupovina ili izgradnja kuće, stana);
6. kada je raseljeno lice iskoristilo pomoć-donaciju za nužnu opravku vlastite kuće, stana u mjestu prebivališta-boravišta;
7. u slučaju smrti.

## **III PRAVA I OBAVEZE RASELJENIH LICA I POVRATNIKA**

### **Član 11.**

Licima kojima je priznat status raseljenog lica i povratnika privremeno se osiguravaju sljedeća prava:

1. pomoć u nužnoj opravci vlastitih kuća ili stanova;
2. pomoć u korištenju kredita ili donacija za otpočinjanje poslova u pogledu stvaranja prihoda za sebe i svoju porodicu;
3. privremeni smještaj;
4. neophodna ishrana;
5. socijalna adaptacija i psihološka podrška;
6. zdravstvena zaštita;
7. obrazovanje djece i omladine;
8. podmirivanje drugih nužnih životnih potreba.

Povratnik ne gubi pravo na pomoć u održivom povratku i nužnoj opravci vlastitog stana ili kuće i nakon prestanka statusa.

Kantoni, u skladu sa materijalnim mogućnostima, licima iz stava 1. ovog člana mogu utvrditi i druga prava.

### **Član 12.**

Privremenim smještajem, u smislu člana 11. stav 1. tačka 3. ovog zakona, smatra se osiguranje prostora za stanovanje lica iz čl. 4., i 5. ovog zakona sa članovima njihove porodice, a on se određuje prema broju i dobi ovih lica.

Privremeni smještaj osigurava se u: prihvatnim – tranzitnim centrima, kolektivnim centrima, naseljima koja su izgrađena, rekonstruirana ili adaptirana za potrebe smještaja lica iz stava 1. ovog člana, kao i stanovima i kućama porodica koje prihvate ova lica i raspoloživim stanovima.

Takav smještaj neće biti dodijeljen ukoliko ta lica imaju na raspolaganju dovoljno sredstava, uključujući primanja, koja su dovoljna za potrebe njihovog smještaja.

Nadležni organ kantona-općine će utvrditi najmanji iznos sredstava iz stava 3. ovog člana za raspolaganje, koji odgovara iznosu sredstava utvrđenom u skladu sa Zakonom o prestanku primjene Zakona o napuštenim stanovima (Službene novine Federacije BiH, br. 11/98, 38/98, 12/99, 18/99, 27/99, 43/99, 56/01, 15/02 i 24/03) i Zakonom o prestanku primjene Zakona o privremeno napuštenim nekretninama u svojini građana (Službene novine Federacije BiH, br. 11/98, 29/98, 27/99, 43/99, 37/01, 56/01, 15/02 i 24/03).

Ukoliko su raseljeno lice i povratnik regulirali smještaj u skladu sa Zakonom o prestanku primjene Zakona o napuštenim stanovima i Zakonom o prestanku primjene Zakona o privremeno napuštenim nekretninama u svojini građana i uz odobrenje nadležnog organa, a od njih je zatraženo da napuste smještaj u kojem se trenutno nalaze, imaju pravo na drugi odgovarajući smještaj u skladu sa ovim zakonom na način i pod uvjetima utvrđenim kantonalnim propisima iz oblasti stambenih odnosa.

Ova odredba primjenjuje se na lica iz stava 1. ovog člana ako se utvrdi da su korisnici kuće ili stana bez odobrenja nadležnog organa, a ne mogu se vratiti u svoje ranije prebivalište, što nadležni organ provjerava po službenoj dužnosti.

### **Član 13.**

Prihvatno-tranzitni centar je zatvoreni prostor koji se sastoji od jedne ili više prostorija funkcionalno povezanih.

U prihvatno-tranzitnom centru moraju se osigurati prostori namijenjeni za: kuhinju sa trpezarijom, pranje veša, kupanje i sanitarne čvorove, prostor za dnevni boravak i spavaone.

Najmanji kapacitet prihvatno-tranzitnog centra je za smještaj 40 osoba, sa minimalnom površinom od 5m<sup>2</sup> po osobi.

Prihvatno-tranzitni centar koristi se za smještaj lica iz čl. 4. i 5. ovog zakona do osiguranja drugog smještaja, a najviše 90 dana od dana prijvata.

### **Član 14.**

Kolektivnim centrom smatra se zatvoreni prostor raznih namjena, koji se koristi u slučaju izuzetne potrebe za privremeni smještaj osoba iz čl. 4. i 5. ovog zakona, do osiguranja drugog trajnijeg smještaja.

Prostor koji se koristi kao kolektivni centar mora zadovoljavati osnovni uvjet da ima jednu ili više prostorija koje su funkcionalno povezane na način kojim se osigurava odvijanje neophodnih funkcija ishrane, spavanja, održavanja higijene i boravka.

Najmanji kapacitet kolektivnog centra je smještaj za 40 osoba, sa minimalnom površinom od 5m<sup>2</sup> po osobi.

#### **Član 15.**

Naseljem koje je namjenski izgrađeno, rekonstruirano ili adaptirano u svrhu smještaja lica iz čl. 4. i 5. ovog zakona smatra se veći broj stambenih i drugih objekata izgrađenih ili rekonstruiranih na ograničenom prostoru u kojima se osigurava prostor od minimalno 6–8m<sup>2</sup> stambene površine po osobi.

U naselju iz stava 1. ovog člana moraju se osigurati uvjeti za odvijanje funkcija ishrane, spavanja, održavanja higijene i drugih uvjeta u vezi sa boravkom ovih osoba.

#### **Član 16.**

Raspoloživim stanovima, u smislu ovog zakona, smatraju se stanovi kojima se osigurava stambeni prostor minimalne površine 8-10m<sup>2</sup> koji se mogu koristiti za privremeni smještaj lica iz čl. 4. i 5. ovog zakona, na način i pod uvjetima utvrđenim kantonalnim propisima i propisima iz oblasti stambenih odnosa.

#### **Član 17.**

Izuzetno, a u cilju osiguravanja potrebnih minimalnih uvjeta za smještaj lica iz čl. 4. i 5. ovog zakona, Vlada Federacije Bosne i Hercegovine (u daljem tekstu: Vlada Federacije), uz suglasnost Vlade Kantona, utvrđuje određene objekte na području kantona koji su od federalnog značaja za privremeni smještaj ovih lica.

#### **Član 18.**

Pravo na neophodnu ishranu, socijalnu adaptaciju i psihološku podršku, zdravstvenu zaštitu, obrazovanje djece i omladine i podmirenje drugih nužnih životnih potreba osigurava se licima iz čl. 4. i 5. ovog zakona, u skladu sa ovim zakonom, kantonalnim propisima i drugim propisima iz oblasti socijalne zaštite.

#### **Član 19.**

Obim prava iz člana 11. tačka 3. do 8. ovog zakona određuje se na osnovu toga da li je lice iz čl. 4. i 5. ovog zakona zaposlena ili ne, da li je korisnik penzije, socijalne pomoći, da li je izdržavano lice ili ostvaruje prihod po drugom osnovu.

Ukoliko lice iz stava 1. ovog člana ne ostvaruje prava navedena u stavu 1. ovog člana, ta prava će ostvarivati u skladu sa propisima kantona.

#### **Član 20.**

Raseljena lica i povratnici dužni su prijaviti svaku okolnost koja utiče na obim ili prestanak prava iz člana 11. ovog zakona, nadležnom organu kantona, u roku od 15 dana od dana nastanka te okolnosti.

Okolnosti iz stava 1. ovog člana nadležni organ provjerava po službenoj dužnosti.

### **IV POVRATAK RASELJENIH LICA I IZBJEGLICA IZ BOSNE I HERCEGOVINE NA TERITORIJU FEDERACIJE BOSNE I HERCEGOVINE**

#### **Član 21.**

Lica iz čl. 4, 5. i 6. ovog zakona imaju pravo da se slobodno vrate u svoja prebivališta ili u druga mjesta koja su izabrali da se u njima nastane, bez rizika uznemiravanja, zastrašivanja, progona i diskriminacije po osnovu spola, nasilja na osnovu spola, uznemiravanja i seksualnog uznemiravanja po spolu.

Povratnici iz stava 1. ovog člana, bez obzira na koji način su se vratili, dužni su se prijaviti nadležnoj općinskoj službi evidentiranja.

Radi stvaranja uvjeta za povratak lica iz stava 1. ovog člana, nadležni organi Federacije, kantona i općine preduzimati će potrebne mjere kao što su: osiguranje slobode kretanja, poštivanje ljudskih prava i osnovnih sloboda, povećanje sigurnosti boravka u mjestu povratka, povrat imovine njihovim vlasnicima, popravak i gradnja kuća i stanova, stvaranje uvjeta za održiv povratak i drugih uvjeta koji utiču na siguran i dostojanstven povratak raseljenih osoba i izbjeglica, i dr.

#### **Član 22.**

U cilju osiguranja jednoobrazne i usklađene realizacije ciljeva utvrđenih Aneksom VII Općeg okvirnog sporazuma za mir u Bosni i Hercegovini na cijeloj teritoriji Bosne i Hercegovine, aktivnosti iz člana 21. stav 3. ovog zakona koordiniraju se unutar Komisije za izbjeglice i raseljena lica Bosne i Hercegovine.

Status i nadležnost Komisije za izbjeglice i raseljena lica uređen je Zakonom o izbjeglicama iz Bosne i Hercegovine i raseljenim licima u Bosni i Hercegovini.

#### **Član 23.**

U cilju stvaranja potrebnih uvjeta za povratak lica iz čl. 4., 5 i 6. ovog zakona, nadležni organi Federacije u saradnji sa Ministarstvom za ljudska prava i izbjeglice Bosne i Hercegovine (u daljem tekstu: Ministarstvo za ljudska prava i izbjeglice), donose planove povratka i repatrijacije ovih lica za teritorij Federacije i područje kantona.

#### **Član 24.**

Vlada Federacije donosi osnove za izradu planova povratka iz člana 25. ovog zakona na prijedlog Federalnog ministarstva.

#### **Član 25.**

Plan iz člana 23. ovog zakona za teritoriju Federacije donosi Vlada Federacije, a za područje kantona vlada kantona.

#### **Član 26.**

U cilju stvaranja uvjeta za povratak raseljenih lica i izbjeglica iz BiH, nadležni organi Federacije i kantona daju potrebne informacije ovim licima, a posebno o uvjetima za povratak i u tom smislu saraduju sa Ministarstvom za ljudska prava i izbjeglice, UNHCR-om i drugim nadležnim međunarodnim organizacijama, ostvaruju međuentitetsku saradnju, međusobnu saradnju, kao i saradnju sa drugim organima i organizacijama.

#### **Član 27.**

Opći kriteriji za utvrđivanje potencijalnih korisnika prava pomoći u rekonstrukciji stambenih jedinica su:

1. da je izbjeglica iz Bosne i Hercegovine, raseljeno lice u Bosni i Hercegovini, ili povratnik;
2. da je iskazao namjeru za povratkom;
3. da je utvrđen status vlasništva ili stanarsko pravo nad stambenom jedinicom koja je predmet rekonstrukcije;
4. da je na dan 30.04.1991. godine imao prebivalište u stambenoj jedinici koja je predmet rekonstrukcije;
5. da se stambena jedinica koja je predmet rekonstrukcije smatra neuslovnom za stanovanje, u skladu s odgovarajućim standardima o minimumu stambenih uvjeta;
6. da on i članovi njegovog domaćinstva od 1991. godine nemaju na teritoriji BiH drugu stambenu jedinicu koja se smatra uslovnom za stanovanje, u skladu s odgovarajućim standardima o minimumu stambenih uvjeta;
7. da nije primio pomoć u rekonstrukciji, dovoljnu da zadovolji odgovarajuće standarde o minimumu stambenih uvjeta.

Federalno ministarstvo će sa Ministarstvom za ljudska prava i izbjeglice i Vladama Republike Srpske i Brčko Distrikta Bosne i Hercegovine zajednički usaglasiti, unutar Komisije za izbjeglice i raseljena lica Bosne i Hercegovine, posebne kriterije za odabir prioritenih korisnika i dobivanje pomoći za rekonstrukciju i povratak, kao i posebne standarde i procedure kojima se osigurava poštivanje općih i posebnih kriterija, puna transparentnost procesa i pristup informacijama od strane korisnika.

Federalno ministarstvo će, svojim podzakonskim aktima, osigurati primjenu posebnih kriterija, standarda i procedura iz prethodnog stava.

#### **Član 28.**

Odluka o odabiru korisnika, sastavljena u skladu sa članom 27. ovog zakona, zajedno sa kriterijima na osnovu kojih su izabrani, objavljuje se u dnevnim novinama i putem općinskih oglasnih ploča, kako u općinama gdje boravi raseljeno lice tako i općinama planiranog povratka, poštujući zaštitu podataka odabranog korisnika pomoći.

### **Član 29.**

U roku od 15 dana po podnošenju žalbi u skladu sa članom 28. ovog zakona, Federalno ministarstvo će provesti postupak provjere zasnovan na podacima koji su sadržani u žalbama i objaviti svoje zaključke, u skladu sa važećim zakonskim propisima.

Nakon provedenog postupka provjere, Federalno ministarstvo o svojim zaključcima u pismenoj formi obavještava podnosiocima žalbi.

### **Član 30.**

Federalno ministarstvo zaključuje pojedinačne tripartitne sporazume, sa svakim korisnikom, koji sadrže lične podatke, kao i količinu i vrstu pomoći, a u skladu sa uputstvom koje će donijeti Ministar u roku od 15 dana nakon stupanja na snagu ovog zakona.

Korisnik potpisuje tripartitni sporazum, zajedno sa licem koje je Federalno ministarstvo ovlastilo za potpisivanje sporazuma u ime Federalnog ministarstva, te ovlaštenim predstavnikom kantona-općine gdje će biti dostavljena pomoć. Svaki potpisnik dobija primjerak sporazuma, a primjerak istog se upućuje i Komisiji za izbjeglice i raseljena lica Bosne i Hercegovine.

### **Član 31.**

Federalno ministarstvo, u skladu sa postupcima određenim zakonom o obligacionim odnosima Federacije Bosne i Hercegovine («Službene novine Federacije BiH», broj: 2/92, 13/93 i 13/94) u skladu sa zakonskim pravima koja proističu iz ugovora, raskida sve ugovore sa dobavljačima koji prekrše važeće tenderske procedure ili koji ne provedu projekte pomoći kako je to utvrđeno ugovorom.

### **Član 32.**

Korisnici imaju pravo da podnesu žalbu Federalnom ministarstvu, ukoliko smatraju da dobavljač sa kojim je Federalno ministarstvo sklopilo ugovor za provedbu projekta pomoći ne ispunjava svoje obaveze ili na neadekvatan način ispunjava svoje obaveze predviđene ugovorom.

Ministar formira komisiju koja će ispitati navode o neizvršavanju ili neodgovarajućem izvršavanju u provedbi projekata pomoći.

Federalno ministarstvo usvaja Pravilnik o radu kojim se reguliše rad Komisije, uključujući i poslovnik i sastav Komisije. Pomenuta Komisija će u pravilu održavati ravnopravnu zastupljenost spolova.

Ministar poduzima odgovarajuće korektivne mjere zasnovane na nalazima Komisije.

### **Član 33.**

Korisnici koji dobiju pomoć na osnovu netačnih podataka ili lažnih izjava, ili u slučaju ako preusmjere pomoć u nenamijenjene svrhe, Federalnom ministarstvu će dati nadoknadu u iznosu pogrešno upotrijebljene ili pogrešno dodijeljene pomoći, ili vraćaju svu pomoć koju su dobili putem Federalnog ministarstva.

### **Član 34.**

Podatke o svim ugovorima, kao i kopije svih ugovora i potvrde o isporuci vodi Federalno ministarstvo i isti će biti dostupni javnosti u skladu sa Zakonom o slobodi pristupa informacijama u Federaciji Bosne i Hercegovine (Službene novine Federacije BiH, br. 32/01).

### **Član 35.**

Federalno ministarstvo osigurava transparentnost svakog odobrenog projekta putem svog knjigovodstva i računovodstva.

Svaki projekat ima jasne budžetske stavke i uključuje sve informacije koje su posebno navedene u uputstvu ili uputstvima kojima se uređuje projekat, a koje izdaje Federalno ministarstvo.

Federalno ministarstvo je obavezno da Komisiju za izbjeglice i raseljena lica Bosne i Hercegovine obavijesti o napretku ostvarenom u provedbi projekata svaka tri mjeseca.

### **Član 36.**

Bliži propis o organizaciji povratka raseljenih lica i lica iz člana 5., u smislu ovog zakona, postupku povratka i drugim pitanjima u vezi sa povratkom ovih osoba donosi Ministar u roku od 60 dana od dana stupanja na snagu ovog zakona.

## **V NADLEŽNOSTI ORGANA U OSTVARIVANJU PRAVA RASELJENIH LICA I POVRATNIKA**

### **Član 37.**

U cilju ostvarivanja prava i stvaranja uvjeta za povratak raseljenih lica i lica iz člana 5. ovog Zakona na teritoriji Federacije, Vlada Federacije, Federalno ministarstvo i nadležni organi kantona, u koordinaciji sa Ministarstvom za ljudska prava i izbjeglice, preuzimaju odgovarajuće mjere, a naročito:

1. Vlada Federacije:
  - donosi plan povratka i repatrijacije raseljenih lica i izbjeglica iz BiH, najmanje jedanput godišnje;
  - donosi plan obnove, izgradnje objekata i naselja za smještaj raseljenih lica i povratnika koji su od federalnog značaja;
  - donosi osnove za izradu planova iz člana 23. ovog zakona;
  - utvrđuje bilans potrebnih sredstava kada nisu dovoljna finansijska sredstva kantona, a sve u cilju stvaranja uvjeta za povratak i ostvarivanje prava raseljenih lica i lica iz člana 5. ovog zakona;
  - nominira članove u Komisiju za izbjeglice i raseljena lica Bosne i Hercegovine.
  
2. Ministarstvo:
  - izrađuje prijedlog godišnjeg plana povratka i repatrijacije iz tačke 1. ovog člana;
  - priprema osnove za izradu planova iz člana 24. ovog zakona;
  - prati realizaciju kantonalnih planova povratka i repatrijacije;
  - koordinira aktivnostima u realizaciji kantonalnih planova povratka i repatrijacije;
  - planira i sprovodi plan izgradnje objekata, rekonstrukciju i obnovu naselja za smještaj raseljenih lica i lica iz člana 5. ovog zakona;
  - priprema bilans potrebnih sredstava iz tačke 1. ovog člana;
  - saraduje sa nadležnim organima kantona, ostvaruje međuentitetsku saradnju i saradnju sa UNHCR-om, drugim međunarodnim organizacijama i drugim organima i organizacijama;
  - vodi centralnu evidenciju o raseljenim licima i licima iz člana 5. ovog zakona na osnovu izvještaja kantona;
  - vodi druge poslove u vezi sa ostvarivanjem prava raseljenih lica i lica iz člana 5. ovog zakona, u skladu sa Ustavom Federacije Bosne i Hercegovine, ovim zakonom i drugim propisima.
  
3. Kanton:
  - donosi plan povratka i repatrijacije za područje kantona;
  - planira i sprovodi izgradnju objekata, rekonstrukciju i obnovu naselja za smještaj raseljenih lica i lica iz člana 5. ovog zakona koji su od kantonalnog značaja;
  - priprema i donosi bilans potrebnih sredstava za područje kantona, radi stvaranja uvjeta za povratak i ostvarivanje prava raseljenih lica i lica iz člana 5. ovog zakona;
  - utvrđuje nosioce aktivnosti i izvore sredstava, potrebnih za ostvarivanje prava raseljenih lica i lica iz člana 5. ovog zakona, za područje kantona;
  - organizira smještaj i rad prihvatno – tranzitnih i kolektivnih centara;
  - vrši popis i vodi osnovnu evidenciju o raseljenim licima i licima iz člana 5. ovog zakona na svom području i dostavlja izvještaj Federalnom ministarstvu;
  - saraduje sa nadležnim organima drugih kantona i nadležnim organima Federacije, kao i sa UNHCR-om, drugim međunarodnim organizacijama, posebno u vezi sa unapređenjem planiranog povratka raseljenih lica i osoba iz člana 5. ovog Zakona;
  - vrši i druge poslove u vezi s ostvarenjem prava raseljenih lica i lica iz člana 5. ovog zakona, u skladu sa Ustavom Federacije Bosne i Hercegovine, ovim zakonom, ustavom kantona, propisima kantona i drugim propisima i aktima.

## **VI POPIS I EVIDENCIJA RASELJENIH LICA I POVRATNIKA**

### **Član 38.**

Nadležni organ kantona vrši popis i vodi osnovnu evidenciju o raseljenim licima i licima iz člana 5. ovog zakona na tom području i mjesečno dostavlja izvještaj Federalnom ministarstvu.

Centralnu evidenciju o raseljenim licima i licima iz člana 5. ovog zakona za teritoriju Federacije vodi Federalno ministarstvo na osnovu osnovnih evidencija iz stava 1. ovog člana.

Bliži popis o vođenju centralne i osnovne evidencije iz ovog člana donosi Ministar.

## **VII SREDSTVA ZA FINANSIRANJE POTREBA RASELJENIH LICA I POVRATNIKA**

### **Član 39.**

Sredstva za finansiranje potreba raseljenih lica i lica iz člana 5. ovog zakona osiguravaju se iz:

- Fonda za povratak koji sufinansira i Vlada Federacije;
- budžeta Federacije;
- budžeta kantona i općina;
- finansijske pomoći zemalja prihvata izbjeglica iz BiH;
- relevantnih međunarodnih organizacija;
- donacija i kredita za ove svrhe, koje su osigurala međunarodne finansijske organizacije, domaći subjekti;
- donacija iz privatnog sektora;
- drugih izvora.

### **Član 40.**

Sredstva za finansiranje koriste se za ostvarivanje potreba i stvaranja uslova za povratak raseljenih lica i lica iz člana 5. ovog zakona, u skladu sa ovim zakonom i propisima kantona.

## **VIII NADZOR NAD PROVOĐENJEM ZAKONA**

### **Član 41.**

Nadzor nad provođenjem ovog zakona i propisa donesenih za njegovo provođenje vrše Federalno ministarstvo i kantonalni organ, svako u okviru svoje nadležnosti.

## **IX KAZNE NE ODREDBE**

### **Član 42.**

Novčanom kaznom od 500 KM do 2.000 KM kaznit će se za prekršaj odgovorno lice u nadležnom organu uprave i radnik organa uprave ako:

1. prizna ili oduzme status raseljenog lica i povratnika suprotno uvjetima ovog zakona (čl. 4-7),
2. onemogućiti privremeni smještaj raseljenom licu i licu iz člana 5. ovog zakona u skladu sa članom 11. ovog zakona,
3. onemogućava slobodan i dobrovoljan povratak raseljenih lica i lica iz člana 5. ovog zakona (član 21.),
4. ne dostavi podatke o popisu i evidencijama raseljenih lica i lica iz člana 5. ovog zakona,
5. učini ili propusti radnju zbog koje su povrijeđena neka od ostalih prava raseljenih lica i lica iz člana 5. ovog zakona koja im pripadaju u skladu sa ovim zakonom,
6. daje netačne podatke ili lažne izjave ili u slučaju ako preusmjeri pomoć u nenamjenjene svrhe iz člana 33. ovog zakona.

## **X PRELAZNE I ZAVRŠNE ODREDBE**

### **Član 43.**

Legitimacije i rješenja kojima se dokazuje status raseljenog lica i uvjerenja o priznatom statusu osoba iz člana 5. ovog zakona izdate na teritoriji Federacije, važit će dok se ne utvrdi drugačije.

**Član 44.**

Kantoni će usaglasiti svoje propise sa ovim zakonom u roku od 90 dana od dana stupanja na snagu ovog zakona.

**Član 45.**

Danom stupanja na snagu ovog zakona, na teritoriji Federacije prestaje primjena Zakona o raseljenim licima–prognanicima i izbjeglicama–povratnicima u Federaciji Bosne i Hercegovine (Službene novine Federacije BiH, br. 19/00,56/01, 27/02, 18/03 i 42/04).

**Član 46.**

Ovaj zakon stupa na snagu osmog dana od dana objavljivanja u “Službenim novinama Federacije BiH”.

Predsjedavajući  
Predstavničkog doma  
Parlamenta Federacije BiH  
**Muhamed Ibrahimović**

Predsjedavajući  
Doma naroda  
Parlamenta Federacije BiH  
**Slavko Matić**